

摘藻堂四庫全書薈要

集部

欽定四庫全書薈要

集部

樂城集卷十三

四

詳校官助教臣常循



欽定四庫全書蒼要卷一萬五千八

集部

樂城集卷十三

宋 蘇轍 撰

詩八十六首

除夜

老
去不自覺歲除空一驚深知無得喪久已罷經營黃

卷譏前失清樽借後生何年遂踈懶伏臘任躬耕

種蘭

蘭生幽谷無人識客種東軒遺我香知有清芬能解穢

更憐細葉巧凌霜根便密石秋芳早
叢倚脩筠午蔭涼
欲遣靡蕪共堂下眼前長見楚詞章

上元夜

新春收積雨明月澹微雲照水疎
燈出因風遠樂聞天涯
仍有節人事竟何分賣酒真拘束
何時一醉醺

次韻王適上元夜二首

燈光欲凝不驚風月色初晴若發蒙
羈客不眠詩未就
遊人半醉夜方中
荒城熠燿相明滅
野水芙蓉亂白紅

知欲訪僧同寂寂應憐病懶畏熅熅

宿雨初乾試火城端居無計伴遊行厭看門外繁星動
想見僧牕一點明老罷逢春無樂事夢回孤枕有鄉情
重因佳句思樊口一紙家書百鎰輕

王子立與遲等遊陳家園橋敗幾不成行晚自酒
務往見之明日雨作偶爾成詠

桃李城東近不遙偶聞花發喜相邀斷橋似欲妨佳思
好雨猶能借此朝隨分開樽依綠草偶然信馬及餘瓢

重來莫道無閒暇
紫燕黃鸝日漸嬌

幽蘭花

李徑桃蹊次第開
穠香百和襲人來
春風欲擅秋風巧
催出幽蘭繼落梅

珍重幽蘭開一枝
清香耿耿聽猶疑
定應欲較香高下
故取羣芳競發時

胡長史祠堂

白首青衫仍隱居
晚拋環堵就安輿
生芻忽改烝嘗地

函丈空悲講解餘
弟子璵璠相照耀
兒孫松桂共扶疎
我來恨不瞻遺老
空怪鄉隣盡讀書

孫賓叟道人

萬里飄然不繫舟
酒壚一笑便相投
千金不換金丹訣
何事惟須一布裘

新橋

六月長橋斷不收
朱欄初喜映春流
虹腰宛轉三百尺
鯨背參差十五舟
入市樵蘇省絡繹
歸家鹽酪免遲留

病夫最與民同喜
卯酉忽忽無復憂

曾子宣郡太挽詞二首

族大徽音遠
年高福祚多
生兒盡龍虎
封國裂山河
象服驚初揜
埋文信不磨
送車江郭滿
咽絕聽哀歌

其二

安輿遍西北
丹旄歷江湖
存沒終無憾
哀榮兩得俱
新封崇馬鬣
餘福薦浮圖
家法蘋蘩在
空堂始一虞

曾子固舍人挽詞

少年漂泊馬光祿末路騫騰朱會稽儒術遠追齊稷下
文詞近比漢京西平生碑版無容繼此日銘詩誰為題
試數廬陵門下士十年零落曉星低

次韻王適一百五日太平寺看花二絕

遍入僧房花照眼細尋芳徑蝶隨行歸時不怕江波晚
新有橋虹水上橫

小檻明牕曾不住閒花芳草遣誰栽但須匹馬尋幽勝
攜取清樽到處開

又次韻遊小雲居

溪上浮花片片輕
泝流登岸得山行
僧房幽絕雲居小
春日陰晴野色明
永遠林棲真有道
溺沮耕養亦忘情
此身此意何年遂
空使常談笑老生

次韻秦觀梅花

病夫毛骨日凋槁
愁見米鹽惟醉倒
忽傳騷客賦寒梅
感物傷春同懊惱
江邊不識朔風勁
墻頭亦有南枝早
未開素質夜先明
半落清香春更好
鄰家小婦學閒媚

靚粧惟有長眉掃孤芳已與飛霞競結子仍先百花老
苦遭橫笛亂飛英不見遊人醉芳草可憐物性空自知
羞作繁華助芒昊

復次前韻答潛師

憐君古木依巖槁西江飲盡須彌倒野花幽草亦何為
嶮韻高篇空自惱萬點浮溪輒長嘆一枝過嶺仍誇早
拾香不忍遊塵汙嚼蕊更憐真味好道人遇物心有得
瓦竹相敲緣自掃誰知真妄了不妨令我至今思璉老

妙明精覺昔未識但向閒牕看詩草浮雲時起鳥四飛
畢竟安能亂清昊

景福順老夜坐道古人搐鼻語

中年聞道覺前非邂逅仍逢老順師搐鼻徑參真面目
掉頭不受別鉗鎚枯藤破衲公何事白酒青鹽我是誰
慚愧東軒殘月上一杯甘露滑如飴

畫枕屏

繩床竹簟曲屏風野水遙山霧雨濛長有灘頭釣魚叟

伴人閒卧寂寥中

次韻王適留別

遠謫勞君兩度行，復將文字試平衡。
干時豈為斗升祿，聞道應忘寵辱驚。
未了新書誰與讀，重留佳句不勝情。
決科事畢知君喜，俗學消磨意自清。

次韻子瞻特來高安相別先寄遲適遠却寄邁迨
過遜

老兄騎驛日百里，據鞍作詩若翻水。
忽吟春草思惠連。

因之亦夢添丁子羣兒競長堪一笑老馬卧餐何日起
聞兄盡室皆舊人見面未曾惟遜耳遲年最長二十六
已能幹父窮愁裡豫兒揚眉稍剛勁黨子溫純無愠喜
我兄憔悴我亦窮門戶久長真待爾但令戢戢見頭角
甌倒囊空定何恥家藏萬卷須盡讀此外一簪無所恃
船中未用廢詩書閉牕莫看江山美

次韻子瞻端午日與遲适遠三子出遊

人生逾四十朝日已過午一違少壯樂日迫老病苦丹

心變為灰白髮粲可數惟當理鉏耰教子藝稷黍誰令
觸網羅展轉在荆楚平生手足親但作十日語朝遊隔
提攜夜卧困烝煮未歌棠棣詩已治芻靈祖士生際風
雲富貴若騎虎柰何貧賤中所欲空齟齬

次韻子瞻留別三首

公來十日坐東軒手自披雲出朝日山川滿目竟何有
波浪翻天同一濕諸門迭出驚異狀間道懷歸終舊壁
此行十里隔江河何人更問維摩疾

野人性似修行僧長願幽居近林麓南遷無計脫簪組
西歸誰為栽松竹頭上白雲即飛蓋耳畔清泉當鳴玉
洛川猶是冠蓋林更願高飛逐黃鵠

東西南北無住身羯末封胡四男子彫鏤不遺治章句
爛漫先令飽文字疎慵嗟我厲之人生子夜中惟恐似
傳家粗足不願餘同駕柴車還我里

次韻子瞻行至奉新見寄

四年候公書長視飛鴻背十日留公談欲作白蓮會

州筠

無可語者往還
但一二僧耳

匏瓜一遭繫賣酒長不在夜歸步江

湄明月照清瀨心開忽自得語異竟非背

音倍

一尊談入

間萬事寂寥外欲同千里行柰此一官礙何年真耦耕
舉世無此大

贈醫僧鑒清二絕

肘後醫方老更精鬚眉白盡氣彌清只應救病能無病
豈是平生學養生

門人久作開堂老庭檜看成合抱圍他日浴堂歸洗背

回頭還解放光輝

贈醫僧善正

老怯江邊瘴癘鄉
城東時喜到公房
歷言五藏如經眼
欲去三彭自有方
身厭遠遊安靜術
因多病更深長
時時為我談尊宿
曾入南公古道場

食菱

野沼漲清泉
烏菱不直錢
蟹肥螯正滿
石破髓初堅
節物秋風早
樽罍夜月偏
令人思淮上
小舫藕如椽

留滯高安四年有餘忽得信聞當除官真揚間偶
成小詩書于屋壁

數間茅屋久蹉跎四見秋風入薜蘿北棹偶然追雁羽
南公誰復伴漁蓑三年賈傅驚吾老九歲劉郎愧爾多
此去仍家江海上不妨一葉弄清波

洪休上人少年讀書以多病出家居泐潭為馬祖
修塔以三絕句來謁答一首

早除郎將少年狂祖塔結緣歸故鄉習氣未消餘業在

逢人依舊琢詩章

勉子瞻失幹子二首

人生本無有衆幻妄聚耳手足非吾親何況妻與子偶
來似可樂強作室家喜忽去未免悲欣成要矜毀君家
兩歲兒畢竟何自始變化違初心涕泗劇翻水吾儕近
始悟造物聊復試道力竟未完聰明信難恃

破甑不復顧彼無愛甑心棄壁負赤子始念愛子深誠
知均非我胡為有不能一從三界遊久被百物侵朝與

喜怒交莫與寵辱臨四物皆不勝生死獨未曾不經大火燒孰為真黃金棄置父子恩長往旃檀林

偶遊大愚見餘杭明雅照師舊識子瞻能言西湖舊遊將行賦詩送之

五年賣鹽酒勝事不復知城東古道場蕭瑟寒松姿出遊誠偶爾相逢亦不期西軒吳越僧弛擔未多時言住西湖中巖谷涵清漪却背閭井喧曲盡水石奇昔年蘇夫子杖屨無不之三百六十寺處處題清詩麋鹿盡相

識況乃比丘師辯淨二老人精明吐琉璃笑言每忘去
蒲褐相依隨門人几杖立往往聞談詞風雲一解散變
化何不為辯入三昧火卯塔長松欹淨老不復出塵尾
清風施蘇公得罪去布衣拂霜髭空存壁間字鬱屈蟠
蛟螭知我即兄弟微官此棲遲問何久自苦五斗寧免
饑俛首笑不答且爾聊教嬉我兄次公狂我復長康癡
反覆自為計定知山中宜但欲畢婚娶每為故人疑君
歸漫灑掃野鶴非長羈

將移績溪令

坐看酒壚今五年恩移巖邑稍西還他年貧富隨天與
何日身心聽我閒山栗似拳應自飽蜂糖如土不須慳
仲卿意向桐鄉好身後烝嘗亦此間

約洞山文老夜話

山中十月定多寒纔過開爐便出山堂衆久參緣自熟
郡人迎請怪忙還問公勝法須時見要我清談有夜闌
今夕客房應不睡欲隨明月到林間

將之績溪夢中賦泊舟野步

扁舟逢野岸試出步崇岡山轉得幽谷人家餘夕陽被
畦多綠茹堆屋剩黃粱深羨安居樂誰令志四方

謝洞山石臺遠來訪別

竄逐深山無友朋往還但有兩三僧共遊渤海無邊處
扶出須彌最上層未盡俗緣終引去稍諳真際自虛澄
坐令顛老時奔走竊比韓公愧未能

贈方子明道人

水銀成銀利十倍丹砂為金世無對此人
斲術不肯傳
闔戶泥墻畏天戒今子何為與我言
人生貧富寧非天
鉗鎚橐籥枉心力
蠶鹽布被隨因緣
我來江西晚聞道
一言契我心所好
廓然正若大虛空
平生伎倆都除掃
子言舊事淨慈師
未斷有為非淨慈
此術要將救饑耳
人人有命何憂饑

回寄聖壽聰老

五年依止白蓮社
百度追尋文室遊
睡待磨茶長展轉

病蒙煎藥久遲留
贊公夜宿詩仍作
巽老堂成記許求
回首萬緣俱一夢
故應此物未沈浮

乘小舟出筠江二首

短舫漂浮真似葉
小蓬低淺僅如巢
幽吟但覺山川走
困睡不知風雨交
紅飯白醪供醉飽
青簑黃蓑可纏包
一竿鶴髮他年事
萬斛龍驤任見朝

官遊欲學林間鵲
每到新年旋疊巢
蓬筍籠船聊似屋
漁樵把臂便成交
不妨袖裡攜詩卷
尚可床頭置藥包

古史欲成身愈困客來未免答譏嘲

寄題孔氏顏樂亭

顏巷久已空顏井固不遷荆榛翳蔓草中有百尺泉誰
復飲此水裹飯耕廢田有賢孔氏孫芟夷發清源廢床
見綆刻古甃昏苔痕引缸注瓢樽千歲忽復然嗟哉古
君子至此良獨難口腹不擇味四體不擇安遇物一皆
可孰為我憂患阮生未忘酒嵇生未忘鍛欲忘富貴樂
託物僅自完無託中自得嗟哉彼誠賢

徐孺亭

徐君鬱鬱澗底松陳君落落堂上棟澗深松茂不遭伐
堂毀棟折傷其躬二人出處勢不合譬如日月行西東
胡為賓主兩相好一榻挂壁吹清風人生遇合何必同
一朝利盡更相攻先號後笑不須怪外物未可疑心胸
比干諫死微子去自古不辨汙與隆我來故國空嘆息
城東舊宅生茅蓬平湖十頃照清廟獨畫徐子遺陳公
二人皆合配社稷胡不相對祠堂中

滕王閣

客從筠溪來，歆仄困一葉。忽逢章貢餘，滉蕩天水接。風
霜出洲渚，草木見毫末。勢奔西山浮，聲動古城業。樓觀
却相倚，山川互開闔。心驚魚龍會，目送鳬雁滅。遙瞻客
帆久，更悟江流濶。使君東魯儒，府有徐孺榻。高談對賓
旅，確論精到骨。餘思屬湖山，登臨寄遺堞。驕王應笑滕
狂客，亦憐勃萬錢。罄一飯千金，賣豐碣。豪風相凌蕩，俳
語終倉猝。

歐陽文忠公嘗云王勃記文
似俳而唐人貴之如此何也

事往空長江人

來逐飛楫短篇竟蕪陋絕景費彈壓但當倒罌瓶一醉
付江月

次韻道潛南康見寄

一葉追隨魚與龍紅粳白酒幸年豐也知山色遙相待
苦畏君詩欲見攻乘興風帆終日去尋幽蠟屐及春同
請君先入開先寺待濯清溪看玉虹

車浮

并序

結木如巢承之以簣沈之水中以浮識其處方舟載

兩輪挽而出之漁人謂之車浮此詩所謂汕也與遲
适同作車浮詩

寒魚得汕便為家兩兩方舟載小車謀食旋遭芳餌誤
求安仍值積薪遮情存未免人先得欲盡要令物莫加
身似虛舟任千里世間何處有罟罟

題都昌清隱禪院

北風江上落潮痕恨不乘舟便到門樓觀飛翔山斷際松
筠陰翳水來源升堂猿鳥晨窺坐乞食帆檣莫遠村誰

道谿巖許深處一番行草認元昆

長老惟提魯識子瞻
兄於淨因有簡刻石

逢章戶掾赴澧州

江船不厭窄船窄始宜行風裏長先過灘頭一倍輕迎
親無惡處祿養勝躬耕澧上春蘭早猶堪弔屈生

除夜泊彭蠡湖遇大風雨

莫發鄒陽市曉榜彭蠡口微風吹人衣霧遶廬山首舟
人釋篙笑此是風伯候杙舟未及深飛沙忽狂走暗空
轉車轂淶水起岡阜衆帆落高張斷纜已不救我舟舊

如山此日亦何有老心畏波濤歸卧塞牕牖土囊一已
發萬竅無不奏初疑丘山裂復恐蛟蜃鬪鼓鐘相轟駭
戈甲互磨叩雲霓黑旗展林木萬弩發曳柴眩人心振
旅擁軍後或為羈雌吟或作倉兕吼衆音雜呼吸異出
殊圈白中宵變凝冽飛霰集粉糅蕭騷蓬響乾晃蕩牕
光透堅凝忽成積澎湃殊未究紵縞鋪前洲瓊瑰琢遙
岫山川莽同色高下齊一覆淵深窺魚鼈野曠絕鳴雉
孤舟四鄰斷餘食數升糗寒蟄僅盈盎腊肉不滿豆敝

裘擁衾眠微火拾薪構可憐道路窮坐使妻子詬幽奇
雖云極岑寂頃未覩一年行將除茲歲真浪受朝來陰
雲剝林表紅日漏風稜恬已收江練平不縐兩漿舞夷
猶連峯吐奇秀同行賀安穩所識問癯瘦驚餘空自憐
夢覺定真否春陽著城邑屋瓦凍初溜艱難當有償爛
漫醉醇酎

正旦夜夢李士寧過我談說神怪久之草草為具
仍以一小詩贈之

先生惠然肯見容
旋買鷄豚旋烹炙
人間飲食未須嫌
歸去蓬壺却無喫

舟中風雪五絕

北風吹雪密還稀
雪勢漸多風力微
孤棹獨依銀世界
山川路絕欲安歸

曉風吹浪作銀山
夜雪爭妍布玉田
風力漸衰波更惡
通宵撼我正安眠

擁纜埋蓬不見船
船牕一點莫燈然
幽人永夜歌黃竹

賴有丹砂暖寸田

濁醪麤飯不成歡
白浪飛花雪作團
牕外時來一雙鴨
沈浮笑我不禁寒

江面澄清雪未融
扁舟蕩漾水無蹤
篙師不用忽忽去
遍省廬山羣玉峯

題南康太守宅五老亭

五老高閒不入城
開軒肯就使君迎
坐中莫著閒賓客
物外新成六弟兄
雲氣飄浮衣袂舉
泉流灑落佩環聲

岌然終日俱無語靜壽相看意自明

書廬山劉覬宮苑屋壁三絕

一作陪南康太守訪廬山劉覬宮苑留題

絕三

山西舊將本書生歸老巖間未厭兵卧聞布水中宵起
錯認邊風萬馬聲

雕弓挂壁恥言勲出入樵漁便作羣五馬親來看射虎
不愁醉尉惱將軍

肩輿已棄躡風騅舊物仍存楊柳枝一曲清歌近尤好

五陵故態未全衰

再遊廬山三首

當年五月訪廬山山翠溪聲寢食間
藤杖復隨春色到寒泉頓與客心閒
巖頭懸布煎茶足峽口驚雷泛葉慳
待得前村新雨遍扁舟應逐好風還

憶自栖賢夜入城道邊蘭若一僧迎
偶然不到終遺恨特地來遊慰昔情
海外聲聞安至此堂中天鼓為誰鳴
匆匆復向深山去一盞醍醐飽栗盞

羅漢院有新羅羅
漢堂中法鼓持大

此山巖谷不知重赤眼浮圖自一峯芒蹻隨僧踐黃葉
曉光消雪墮長松石泉試飲先師錫午飯歸尋下寺鐘
勝處轉多恐渾忘出山惟見白雲濃

池陽阻風

鍾陵距池陽相望千里內江神欺我貧屢作風雨礙欲
投皖公宿三日逢一噫孤蓬面空山朝食淡無菜白醪
幸餘瀝黃卷漫相對饑吟非吾病疾走老所戒焦先近
不遠蝸舍聞尚在區區問養生借我一帆快

張嘉祐

道人何為者陽狂時放言寶塔昔所構鉄券今尚存

此張

所言其餘
都不可曉

漫浪難究悉孰知彼根源草菴劣容膝俯仰

拳肩跟無食輒行乞一飽常閉門爾來二十年未嘗變

寒溫嗟哉豈徒然此意未易言偶來一笑喜但恐笑我
昏

效韋蘇州調嘯詞二首

漁父漁父水上微風細雨青簑黃鶯裳衣紅酒白魚莫

歸莫歸莫歸歸莫長笛一聲何處

歸雁歸雁飲啄江南南岸將飛却下盤桓塞北春來苦
寒苦寒苦寒苦藻荇欲生且住

至池州贈陳鼎秀才

淮陽學舍舊相依常誦曹溪第一機却到江西心有悟
回看過去事皆非孤舟遠適身如寄二頃躬耕道自肥
欲看齊山君去否間中徒侶近來稀

次韻遲初入宣河

遠客安長道低篷稱小溪雲添濕帆雨舟滯沒蒿泥草
綠耕牛健村深候鳥啼陶翁方作令歸去未成題

次韻侯宣州利建招致政汪大夫

社甕壺漿接四隣肩輿拄杖試紅塵慣眠林下三竿日
來看城中萬井春世上升沈無限事樽前強健不貲身
經過已足知公政長見車中有老人

次韻侯宣城疊嶂樓雙溪閣長篇

作官如負擔一負當且弛不知息肩處妄問道遠邇我

乘章江流却入宛溪水捨舟陟崔嵬行路極句已名都
便欲過佳處賴公指仰攀疊嶂高俯閱雙溪美不悟身
乘空但覺風吹耳雲烟變遙壑歌吹聞近市倦遊得清
曠行役有新喜公言頃榛穢斬伐從我始堰水種蒲蓮
開山蒔梅李擁本待成陰養花要食子遺風揖桓謝父
老邀黃綺邦人魚依蒲食客莪在芷春陰迫寒食謂我
姑且止嗟余去鄉國屢把刀環視感公鵠鷺脩憐我鳬
鴨庫異邦逢故人寧復固辭理高談雲漢上爛醉笙歌

裡落日盡公歡推挽未應起

初到績溪眎事三日出城南謁二祠遊石照偶成
四小詩呈諸同官

行年五十治丘民初學催科愧廟神無限青山不容隱
却看黃卷自憐貧雨餘嶺上雲披絮石淺溪頭水感鱗
指點縣城如手大門前五柳正搖春

右梓桐廟

石門南出衆山巔沃壤清溪自一川老令舊諳田事樂

春耕正及雨晴天可憐鞭撻終無補早向叢祠乞有年
歸告仇梅省文字麥苗含穗欲蠶眠

右汪王廟

行盡青溪到碧峯陰崖翠壁畫杉松故留石照邀行客
上徹青山最後重

雨開石照正新磨鳥度猿攀野客過忽見塵容應笑我
年來底事白鬚多

右石照二首

縣中諸花多交代江君所栽牡丹已過芍藥方盛
偶寄小詩

偶來山邑便成家慚愧潘生滿縣花想見清樽檻邊飲
尚留佳句壁間誇根株未老年年好艷色方穠日日加
聞道北遊無意味春深河上足風沙

楊主簿日本扇

扇從日本來風非日本風風非扇中出問風本何從風
亦不自知當復問大空空若是風穴既自與物同同物

豈空性是物非風宗但執日本扇風來自無窮

次韻答人幽蘭

幽花耿耿意羞春紉佩何人香滿身一寸芳心須自保
長松百尺有為薪

次韻江法曹山間小酌

高情不柰簿書圍行揖青山肯見隨綠野逢花將盡日
清樽迨我正閒時簷間雙燕欲生小葉底新梅初滿枝
笑殺華陽窮縣令床頭酒盡只頻眉

官舍小池有鷓鴣遺二小雛二首

半畝清池藻荇香一雙鷓鴣競悠揚
來從碧澗巢安在飛過重城母自將
野鳥似非官舍物宰君昔是釣魚郎
直言愧比奇章老得縣無心更激昂

清池定誰至鷓鴣自來馴知我無傷意
憐渠解托身橋陰棲息穩島外往來頻
勿食遊魚子從教長細鱗

次韻答人見寄

對案青山雲氣騰天將隙地養無能
牕扉迎署梅將溜

虛市無人冷欲冰
寂默忘言慚社燕
鵲困睡比春鷹
深知大府容衰病
復值年來蚕麥登

次韻答人檻竹

猗猗元自直
落落不須扶
密節風吹展
清陰月共鋪
叢長傲霜雪
根瘦恥泥塗
更種愁無地
應須翦碧蘆

樂城集卷十三

欽定四庫全書薈要卷一萬五千九

集部

樂城集卷十四

宋 蘇轍 撰

詩八十五首

次韻王荐推官見寄

可憐衰病孰為媒
私喜隣邦得雋才
玉案愧無酬錦繡
木瓜却用報瓊瑰
風流似欲傳諸謝
格律猶應學老梅
始信山川出才士
扁舟新自宛溪來

荐宣人也

郭尉愿惇夫以琳上人書詩為示次韻

勉強冠裳四十餘同官早歲亦山居朝來過我三竿日
袖有幽僧數紙書家住一廛何計反官供五斗未應無
聞渠秋後來相訪脫粟藜羹只自如

次韻汪琛監簿見贈

連宵暑雨氣如秋過客不來誰與遊賴有澹臺肯相顧
坐令彭澤未能休琴疎不辨彈新曲學廢誰令致東修
慚愧邑人憐病懶共成清淨勸遲留

周昉畫美人歌

深宮美人百不知飲酒食肉事遊嬉彈絲吹竹舞羅衣
曲終對鏡理鬢眉岌然高髻玉釵垂雙鬟窈窕萼葉微
宛轉躑躅從嬰兒倚楹俯檻皆有姿擁扇執拂知從誰
瘦者飛燕肥玉妃俯仰向背樂且悲九重深遠安得窺
周生執筆心坐馳流傳人間眩心脾飛瓊小玉雲霧幃
長風吹開忽見之夢魂清夜那復追老人衰朽百事非
展卷一笑亦胡為持付少年良所宜

病中郭尉見訪

偶成三日寒兼熱知是多聞力未全却問藥王求妙劑
慙非摩詰已虛圓勞公強說修行漸顧我方為病垢纏
應是床頭有新酒欲邀佳客故留連

病後

一經寒熱攻骸骨正似兵戈過室廬柱木支撐終未穩
筋皮收拾久猶踈芭蕉張王要須朽雲氣浮游畢竟虛
賴有衣中珠尚在病中點檢亦如如

復病三首

病作日短至病消秋氣初山深足氛瘴俗儉少肴蔬藥
亂曾何補心安當自除朝廷閔流落已是脫遷居

其二

寒作埋冰雪熱攻投火湯今生那有此宿業未應亡委
順一無損力爭徒自傷頽然付一榻是處得清涼

其三

一病五十日復爾當解官不才歸亦樂無食去猶難甞
勉人應笑低徊意已闌舊師摩詰老把卷靜中看

送琳老還大明山

身老與世疎但有世外緣五年客江西掃軌謝往還依
依二三老示我馬祖禪身心忽明曠不受垢汙纏偶成
江東游欲別空悽然緣散衆亦去飄若風中烟

高安三
長老與

之甚熟別後文老去洞山
聰老去聖壽全老化去

華陽本荒邑緇素明星懸偶

然得老尉舊依育王山璉公善知識不見十九年我昔
未聞道問以所入門告我從信入授我普眼篇冉冉百
尺松起自一寸根南歸髮盡白尺書今始傳不知鄰邑

中乃有門人賢百里走相訪觸熱汗雨翻懷中出詩卷
清絕如斷蟬我適病寒熱氣力才綿綿空齋默相向欲
語不能宣未暇答佳意歸錫鏘金環空有維摩病愧無
維摩言

病退

冷枕單衣小竹牀卧聞秋雨滴心涼此間本淨何須洗
是病皆空豈有方示疾維摩元自在放身南嶽離思量
病根欲去真元在中夜夢遊何有鄉

病後白髮

枯木自少葉不堪經曉霜病添衰髮白
梳落細絲長筋力從凋朽肝心罷激昂
勢如秋後雨一度一淒涼

答琳長老寄幽蘭白朮黃精三本二絕

谷深不見蘭生處追逐微風偶得之
解脫清香本無染更因一嗅識真如

老僧似識衆生病久在山中養藥苗
白朮黃精遠相寄知非象馬廢柔調

次韻侯宣城題疊嶂樓

小邑來時路宣城最近隣樓臺百年舊花竹一番新登
覽春深日凝思病後身何時對樽酒重為洗埃塵

初聞得校書郎示同官三絕

讀書猶記少年狂萬卷縱橫曬腹囊奔走半生頭欲白
今年始得校書郎

百家小邑萬重山慙愧斯民愛長官粳稻如雲梨棗熟
暫留聊復為加餐

病後濁醪都少味老來歡意苦無多
臨行寂寞空相對
不作新詩柰客何

績溪二詠

豁然亭

南省城市北看山每到令人意豁然
碧瓦千家新過雨
青松萬壑正生烟
經秋卧病聞斤響
此日登臨負酒船
徑請諸君作佳句
壁間題我此詩先

翠眉亭

誰安雙嶺曲彎彎眉勢低臨戶牖間斜擁千畦鋪綠水
稍分八字放遙山愁霏宿雨峯巒濕笑卷晴雲草木間
忽憶故鄉銀色界舉頭千里見蒼顏

辭靈惠廟歸過新興院書其屋壁

來時稻葉針鋒細去日黃花黍粒麤久病終慙多暇政
豐年猶喜慰耕夫青山片片添紅葉綠水星星照白鬚
東觀校讐言非老事眼昏那復競鉛朱

郭尉惠古鏡

凜如秋月照虛空遇水留形處處同一瞬自成千億月

精神依舊滿胸中

俗言以鏡予人損已精神故解之云

歙縣歲寒堂

檻外甘棠錦繡屏長松何者擅亭名浮花過眼無多日
勁節凌寒盡此生暗長茯苓根自大旋收金粉氣尤清
長官不用求琴譜但聽風吹作弄聲

邵武游氏老人三清堂紫芝

黑龜赤鳳早逢師白髮蒼顏老不衰丹鼎一九深自秘

紫芝三葉却先知烟熏晴日雲容薄色凝秋霜玉性奇
何日刀圭救羸病盡芟荆棘種交梨

神宗皇帝挽詞三首

稽古堯無作勤邦禹有功政新天地力事改漢唐風禮
樂寰中盛梯航海外通華封徒有誦龍御忽乘空

其二

承平終不處副託重艱難統接神孫正人依聖母安橋
山封劍佩原廟見衣冠萬國纏哀處嵩陽檜栢寒

其三

取士忘疎賤量書廢寢興
芻言本何益玉殿最先登
日角依稀想堯言涕泗稱
龍髯遠莫及零淚凍成冰

舟過嚴陵灘將謁祠登臺
舟人夜解及明已遠至
桐廬望桐君山寺縹緲可
愛遂以小舟遊之作二絕

扁舟忽草出山來慚愧嚴
公舊釣臺舟子未應知此
恨夢中飛楫定誰催

嚴公釣瀨不容看猶喜桐君有故山
多病未須尋藥錄
從今學取衲僧閒

沂潮二首

潮來海若一長呼潮去蕭條一吸餘
初見千艘委泥土
忽浮萬斛沂空虛映山少避曾非久
借勢前行却自如
天地尚遭人意料乘時使氣定麤疎

足練縈回出海門黃泥先變碧波渾
初來似欲傾滄海
正滿真能倒百源流枿飛騰竟何在
扁舟睥睨久仍存

自慚不作山林計來往終隨萬物奔

贈王復處士

候潮門外王居士平昔交遊遍海涯
本種松杉為老計晚將亭榭付隣家
為生有道終安穩好事來遊空嘆嗟
猶有東坡舊詩卷忻然對客展龍蛇

王君舊有園亭子
瞻兄名之曰種德

其亭頃以貧
故闢之矣

張楊山人即昔所謂惠思師也余舊識之於京師
忽來相訪茫然不復省徐自言其故戲作二小詩

贈之

昔日高僧今白衣
人生變化定難知
故人相見不相識
空怪解吟無本詩

聽誦長江近章句
喜逢澄觀已冠巾
醉吟揮弄清潮水
誰信從前戒律人

次韻子瞻送楊傑主客奉詔同高麗僧遊錢塘

人言長安遠如日
三韓住處朝日赤
飛帆走馬入齊梁
却度吳江食吳橘
玉門萬里唯言九
行人淚墮陽關酒

佛法西來到此間遍滿曾如屈伸手出家王子身心虛
飄然渡海如過渠遠來忽見傾盆雨屬國真逢戴角魚
至人無心亦無法一物不見誰為敵東海東邊定有無
拍手笑作中朝客

寄龍井辯才法師三絕

井序

轍自績溪蒙恩召還將自宣城沿大江以歸家兄子
瞻以書告曰不如道歛溪過錢塘一觀老兄遺迹轍
用其言既至吳中迫於水涸不能久留十月八日遊

上天竺子瞻昔與辯才師相好今隔南山不得見乃
作三小詩以寄之

我兄教我過東吳遺墨山間無處無忽報冬潮催出渥
俗緣深重道心麤

山色青冥葉未紅湖光凝碧曉無風行窮上下兩天竺
望斷南山龍井龍

井水中藏東海魚側盆翻雨洗凡夫隔山欲共公相見
莫道從來一滴無

元絳參政挽詞

吳越朝天功在民當年卿相亦仁人曾孫終與元豐政
故老猶知異代因吏治清明開白日文詞俊發吐青春
鄴都從事堂中客涕灑高原栢子新

過王介同年墓

平生使氣坐生風徐叩方知學有功應奉讀書無復忘
虞翻忤物自甘窮埋根射策久彌奮投老為邦悍莫攻
墳木未須驚已拱少年我亦作衰翁

昔與仲甫同登制
科僕年最少今已

笑 老

將遊金山寄元長老

麤砂施佛佛欣受怪石供僧僧不嫌空手遠來還要否
更無一物可增添

元老見訪留坐具而去戲作一絕調之

石霜舊奪裴休笏坐具只今君自留留放書房還會否
受降曾不費戈矛

元老和示小詩自謂非戰之罪復作一絕并坐具

還之

請君却領彌天具不欲終收陷虎名
莫道昏沉非戰罪何如不戰屈人兵

子瞻與長老擇師相遇於竹西石塔之間屢以絕句贈之又留書邀轍同作遂以一絕繼之

遠老陶翁好弟兄虎溪廬阜久逢迎
何須更要經平子清議從來貴士衡

高郵贈別杜介供奉

淮南魚米年年賤直便歸休無俸錢錦背圖書何益事
塵生弦筦正參禪逢人未廢一樽酒送客長隨百里船
世上得如君自在不須開府事開邊

幾先去年送家兄
子瞻至高郵今年

復留此
相別

答王定國問疾

五年竄南荒頑質不伏病吸清吐濁穢氣練骨隨勁澹
然久忘歸寂寂就遐屏國恩念流落牽挽畀隣境葉舟
沂長江藤鞋過重嶺峽深薦蘿惡山險崖石橫恢台夏

初發氛霧秋愈盛菰蔞食有時豚羔詎曾省門開訟氓
入日晏鳩舌競肝脾得寒熱冰炭迫晨暝俚醫固空疎
蠻覲劇麤猛老妻但坐哭遺語未肯聽長子亦在床一
卧昏不醒思歸未可得即死副前定如如性終在冉冉
歲將冷筋骸稍輕安冠服強披整餘方厭苓朮日食禁
醪茗髮衰亂隨櫛骨瘦空看影簿書勉復親環玦非所
請馬老固伏櫪槎流舊安井凌競就輕車邂逅出脩綆
此生誠夢幻俛仰成弔慶故人枉新詩萬里慰孤耿賞

音我非曠斲鼻君真郢南遷昔所同卧疾今亦並遠行
信由天未死庸非命歸舟正飄兀齋舍念清淨作書附
鴻翼去路瞻斗柄聞水漸安流吳音未全正一樽對清
言及此冬夜永

和子瞻次孫覺諫議韻題郡伯閘上斗野亭見寄
扁舟未遽解坐待兩閘平濁水汙人思野寺為我清昔
遊有遺咏枯墨存高甍故人獨未來一樽誰與傾北風
吹微雲莫寒依月生前望邗溝路却指鐵甕城茅簷卜

茲地江水共晨烹試問東坡翁畢老幾此行奔馳力不

足隱約性自明早為歸耕計免慙老僧榮

僧榮斗野主人也子瞻將

卜居丹陽蒜山下此亭正當歸路故云爾

次韻子瞻題泗州監倉東軒二首

肩輿嫋嫋渡浮梁吏隱知君寄一倉十里遙看飛皂蓋
小軒相對有壺漿清霄往往投車轄永日霏霏散篆香
留滯淮南久仍樂莫年何意復為郎

萬斛塵飛日為靈無心退食自成齋梅生紅粟初迎臘

魚躍銀刀正出淮卧病空看帆度磧誦詩猶記雪填階
夾河南北俱形勝且借高城作兩崖

答顏復國博

歲晚河水留畫船一軒脩竹喜蕭然詩詞溫厚新成格
道論精微近入禪病後不勝清醕醕別時仍得舊書傳
欲成古史須咨考陋巷何因接尺椽

次韻王定民宣德

彭城寺壁看詩來顏氏瓢樽偶共開茅屋未完先鑿沼

竹林成後想宜梅新詩妙絕難為繼高論微低得共陪
第一詞人生不識茲行尚喜揖君才

河水

扁舟多艱虞與我平日類初乘滂洋流旋涉凍淺地日
西陰風作夜半流澌至悄然孤寂枕覺此凝冽氣河聲
噤不喧燈花結復墜忽來觸舟去聲與裂帛似平明發
窗扉吏卒僵未起奔騰陣馬過洶湧晴雲駛紛紛散環
玦卷卷浮席被匯流忽騰感曲岸相撐抵欹危起丘山

汗漫接洲沚連艘恣凌輶千槳競紛委剛強初悍頑潰
散終披靡掃除就虛曠沿沂弄清泚我行無疾徐乘流
得坎止偶然追還期愧此墮千指陰陽有定數開塞亦
常理窮冬治舟行嗟此豈天意

復賦河水四絕

客心凜凜怯寒水擁褐無言夜漏深河伯似知歸意速
風號西北故相禁

春來歸夢劇飛鳧夜半流澌擁舳艫似勝去年彭蠡口

雪封廬岳浪翻湖

朝來縣令借長船仍遣千夫上下牽不惜瓊瑤分衆手
貪看雪片滿河孺

輕紈破碎珮環流顛倒鉞鳴亂觸舟解紼投篙曾不顧
不知何處擁汀洲

河水稍解喜呈王適

留滯江湖白髮生西歸猶苦凍崢嶸春風未到冰先解
河水初深船自輕去國偶然經晝夢逢人稍欲問都城

羈鴻共有成行喜雙鯉應將尺素迎

河水復結復次前韻

懊惱河水散復生徂年近已失崢嶸身留短舫厭厭睡
目送飛鴻一一輕引緯低徊疑上坂打凌辛苦甚攻城
東風憐我歸心速稍變楊梢百里迎

題南都留守妙峯亭

我登妙峯亭欲訪德雲師春陽被原野睢渙含流澌未
復桃李色稍增松桂姿子子東來檣冉冉將安之萬物

委天運此身免奔馳
悵然懷舊遊一丘覆茅茨
清冷久沮如文雅空顏隳
提攜二三子醉倒春風吹
不見妙峯處安知德雲期
南遷久忘反有獲空自知
歸來覽新構恍然發深思
遠行極南海此地初不移
酌我一斗酒盡公終日嬉
德雲非公歟相對欲無詞

次韻發運路昌衡淮南見山堂

疊石初成得賜環
未應苔蘚上蒼顏
據鞍華岳旌旄裡
回首淮山夢想間
烽火日傳西塞靜
丘陵應伴壯心閒

終南太白皆公有肯向庭中更作山

送戴朝議歸蜀中

岷山招我早歸來
劍閣橫空未易回
北叟忽驚鷓鴣晚
西轅欲及海棠開
避仇賦客親耕耒
因亂詩翁著酒杯
但愛江山無一事
為言父老莫相猜

後省初成直宿呈子瞻二首

掖垣初罷斧斤響
棟宇猶聞松桂香
江海暫來俱野客
雲霄並直愧華堂
月明似與人烟遠
風細微聞禁漏長

諫草未成眠未穩始知天上極清涼

射策當年偶一時對床夜雨失前期廬間還往無多地
夢裡追尋亦自疑螭墨屢乾朝已久囊封希上出猶遲
茅簷半破松筠老歸念蕭然欲語誰

次韻子瞻送陳睦龍圖出守潭州

海上石橋餘折棟大舶記君過鐵甕東行萬里若乘空
老蜃長鯨應入鞆波搖風卷卧不起免教髀肉鞍磨痛
歸來過我話艱苦驚汗津津尚流汞海涯風物畫成圖

錯落天吳兼紫鳳至今想像隔人世往往風濤吹晝夢
長沙欲往厭飛楫幸有千兵作迎送文章清逸世少比
科第崢嶸聲自重遠行屢屈衆所歎出祖誰攀車欲動
明朝鼓角背王城莫聽單于吹曉弄

子雍奉使三韓轍
時在南都見其往

返故此
詩言之

送千之姪西歸

京洛東遊歲月深相逢初喜解微吟夢中助我生池草
別後同誰飲竹林文字承家憐女在風流似舅慰人心

便將格律傳諸弟王謝諸人無古今

駕幸親賢宅贈隨駕諸公

日日南風夜氣煩一聲鳴趯萬人看
禁溝飛水清黃道涼殿分水遍從官
急雨未成昏觀闕微颺稍覺泛和鑾
相看揮汗塵埃裡散髮何人舊不冠

次韻子瞻飲道者院池上

雨氣涼侵殿河流滲入池黃梁淪魚子
白酒瀉鵝兒風細初生袖塵清免汙眉
郊行不易得拂壁看題詩

答孔平仲惠蕉布二絕

裘葛終年累已輕
薄蕉如霧氣尤清
應知浣濯衣稜敗
少助晨趨萃蔡聲

燈籠白葛扇裁紈
身似山僧不似官
更得雙蕉縫直掇
都人渾作道人看

次韻朱光庭司諫喜雨

焦枯連夏火洗濯待秋霖
都邑溝渠淨郊原黍豆深
流膏侵地軸晴意動風琴
誰似臣居易先成喜雨箴

次韻光庭省中書事

放浪江湖久情慵安排誰置從官中麈疎空與延和對
開納初還貞觀風二鄙兵消真帝力四方雨足自天功
時將一勺傾滄海漫使人知達四聰

送張恕朝奉南京簽判二首

楚蟹吳柑初著霜梁園官酒試羔羊老如計相非無齒
清似留侯未却糧杖屨稍通賓客過穀蔬要遣子孫嘗
詔書委曲如公意幕府新除朱紱郎

朱紱還家罷倚門留都無事最宜親下車趨走驚隣舍
決獄平反慰老人相見只今多邂逅舊遊他日半埃塵
何年重起扁舟興會作東湖十日賓

送賈訥朝奉通判眉州

歸念長依落日邊壺漿今見逆新官聲傳已覺謳歌遍
身到前知政令寬民病賢人來已暮時平蜀道本無難
明年我欲脩桑梓為賞庭前荔子丹

眉州倅廳舊有
荔枝二株甚大

次韻黃庭堅學士狸毛筆

不悟身邊一斗紅
聖賢隨世亦時中
何人知有中書巧
傳送能書陳孟公

李誠之待制挽詞二首

脫遺章句事經綸
滿腹龍蛇自屈伸
南駕威聲傳絕域
西征舊恨失姦臣
空留諫疏驚頽靡
終託詩詞話苦辛
直氣如雲未應盡
一雙嗣子亦騏驎

濟南風物在西湖
湖上逢公初下車
談笑樽前伏齊虜
旌旗門外聽除書
一封未奏先焚草
三黜歸來便種蔬

淚落西堂歌酒地杉松空見歲寒餘

司馬溫公挽詞四首

白髮三朝舊青山一布衾封章留帝所德澤在人心未
起謳吟切來歸顧託深楊公不久住天意定難忱

其二

決策傳賢際危言變法初紛紛者往事一一驗遺書富
貴終何有清貧只自如西州不忍過行哭便回車

其三

區區非為已懇懇欲忘生力盡心終在身亡勢亦成遺
民拋劍戟故老半公卿魏丙生前友俱傳漢相名

其四

少年真狷淺射策本麤疎欲廣忠言地先收衆棄餘流
離見更化邂逅捧除書趙孟終知厭他人恐罵予

送表弟程之元知楚州

與君外兄弟初如一池魚中年雲雨散各異澗谷居客
舍復相從語極長欬歔青衫奉朝謁白髮驚晨梳百年

不堪把一樽歡有餘清言我未厭昨夜聞除書淮南旱
已久疲民食田蔬詔發上供米仍疏古邗渠要須賢使君
均此積歲儲徑乘兩槳去不待五馬車別離難重陳勞
徠不可徐政成得召節歲晚當歸歟

送王震給事知蔡州

朝廷入忘返冠蓋如雲屯賢哉貴公子獨以民社言西
臺出命書落筆波濤翻東臺典封駁坐惜日月奔試劇
得上蔡高卧強東藩旱歲獨多麥時雨如傾盆鈴軒省

鞭扶幕府多壺樽逡巡文字樂片去簿領煩賜環行當
至坐席恐未溫三槐日成陰富貴屬曾孫

送王廷老朝散知虢州

蒲腹貯精神觸手會衆理一廢十五年直坐才多爾我
昔遊宋城憶始識君子簿書填丘山賓客亂蜂螳出尋
城下宅屢徙床前履清談如鋸木落屑紛相委解頤自
有樂置酒姑且止逡巡破黃封婉婉歌皓齒風高熊正
白霜落蟹初紫夜闌意未厭河斜客忘起歸來笑僮僕


熟醉未曾爾江湖一流蕩歡意日頽弛西還經舊遊相逢值新喜詔催西州牧門有朱轡柅都城挽不住山賊近方侈提刀索崖谷援桴動閭里居家百無與王事非有已何日却休官復飲梁王市

送魯有開中大知洛州次子瞻韻

仲連雖不仕而非綺與園逡巡笑談間屢解戰鬪繁子敬識二孫長揖鼓輦喧意氣感周郎振策起江村二賢繼英風千載為高門曾孫事仁祖風義夙所敦臺閣餘

故事父老稱遺言白髮識公子十載友元昆婆娑久不試
俛仰色愈溫五馬忽嘶鳴朱輪夾征軒旌旄隔河至部
曲幾人存銅虎不可留芻狗行當燔秋潦決河防遺黎
化驚魂憂心念千里何暇把一樽西城叩門別南風吹
帽翻嗟我限出謁未敢逾短垣新晴水尚壯想見民驚
奔安得萬丈堤止此百里渾姑爾救一境誰當理其源
百聞貴一見尺書為我論

樂城集卷十四



總校官庶吉士臣張能照

校對官庶吉士臣陳文樞

謄錄監生臣呂燕昭

欽定四庫全書薈要

集部

樂城集卷十五

六

詳校官助教臣常循



欽定四庫全書薈要卷一萬五千十

集部

樂城集卷十五

宋 蘇轍 撰

詩八十五首

送陳侗同年知陝府

上書乞江淮得請臨關河所得非所願親友或相訶大

夫志四方所遇常逶迤况當國西屏形勝古來多崑渠
湧北郭華岳垂東阿羗虜昔未平驛騎如飛梭間諜時
出沒闕梁苦誰何爾來一清淨西望多麥禾魏絳方和

戎先零正投戈秦人釋重負道路聞行歌便當臥齋閣
次第除網羅時時一嘯咏未用勤催科諸孤寄吳越食
口如鴈鵝時分橐中金何必手自摩

次韻李曼朝散得郡西歸留別二首

風波定後得西歸烏鵲喧呼里巷知未熟黃梁驚破夢
相看白髮信乘危豚肩尚有冬深味蠶器應逢市合時
父老爲公留臘酒不須猶唱式微詩

懷印徒行尚故衣郎中掾史見猶疑千人上塚鄉關動

五馬行春雨澤隨醉裏墜車初未覺道中破甑復誰悲
西行漫遣親朋喜早賦陶翁歸去詩

送程建用宣德西歸

昔與君同巷參差對柴荆艱難奉老母弦歌教諸生藜
藿飽臧獲布褐均弟兄貧賤理則窮禮義日益明我親
本知道家有月旦評逡巡戶牖間時聞歎息聲善惡不
可誣孝弟神所聽我見此家人處約能和平它年彼君
子豈復地上行爾來三十年遺語空自驚松阡映天末

苦淚緣冠纓子親八十五皤然老人星安輿及祿養平
反慰中情月俸雖不多足備甘與輕今年復考課得秩
真代耕倚門老鶴望策馬飛鴻征歸來歲云莫手奉屠
蕪觥我詩不徒作以遺鄉黨銘君昔嘗稅居與樊廬東
西相望武昌君見其家
事知非貧賤人也此語未嘗語人俛仰三
十年矣因君西歸作詩言之不覺流涕

次韻子瞻杜介供奉送魚

天街雪霽初通駟禁籞冰開漸躍魚十尾煩君穿細柳
一杯勸我莖青蔬寒樽獨酌偶逢客佳句相酬不用書

江海歸來叨禁近空令同巷往來踈

次韻子瞻招王蘧朝請晚飲

矯矯公孫才不貧白駒銜雪喜新春忽過銀闕迷歸路
誤認瑤臺尋故人訪我不嫌泥正滑留君深愧酒非醇
歸時九陌鋪寒月清絕空教僕御顛

子瞻與李公麟宣德共畫翠石古木老僧謂之憩
寂圖題其後

東坡自作蒼蒼石留取長松待伯時只有兩人嫌未足

更收前世杜陵詩

王君貺宣徽挽詞三首

妙年收賈傳白首貴王陽志氣文章在功名歲月長遺
孫依舊德故吏滿諸方河朔三持節斯民定不忘

其二

謫墮神仙侶飛翔鸞鳳姿舊逢黃石老陰許赤松期歷

歷僧伽記申申鄧傳詞翻然歸海嶠無復世人知

公少年過

泗州於僧伽塔中見一老僧謂公歸視祖墓有白兔者
君當第一人及第已而果然既登科見張鄧公爲公言

吾為射洪令尉捕得一人疑其行劫吾覺其非是釋之
問其所從來則山中隱者也以藥遺我曰服此藥可以
終天年而無病且約我貴極人臣今子方且貴慎勿答
辱道人公終身用其言轍佐公於大名親見公言之

其三

從軍在河上仗鉞喜公來幕府方閒暇歌鐘得縱陪它

年老賓佐過國泣樓臺猶有墳碑在仍令故客開

今樞密安

公厚卿昔與轍同在幕府
公家方求厚卿作墓碑

送杜介歸揚州

揚州繁麗非前世城郭蕭條却古風尚有花畦春雨後

不妨水調月明中東都甲第非嫌汝北牖羲皇自屬翁
清洛放船經月事急先題鵠遶芳叢

次韻子瞻與鄧聖求承旨同直翰苑懷武昌西山
舊遊

我遊齊安十日回東坡桃李初未栽扁舟亂流入樊口
山雨未止淫黃梅寒溪間有古精舍相與推挽登崔嵬
山深縣令喜客至寺荒蔓草生經臺黃鵠白酒得野餽
藤床竹簟無纖埃可憐遷客畏人見共恠青山誰爲堆

行驚晚照催出谷中止亂石傾餘壘古今相望兩令尹

謂元結與
鄧君也

文詞灑落千山隈野人豈復識遺趣過客時

爲剡蒼苔五年留滯屐齒禿一朝揮手船頭開玉堂却
憶昔遊處笑問五柳應彫摧滿朝文士蚤貴達馮凌霄
漢乘風雷入叅祕殿出華省何曾著足空山來漂流邂
逅覽遺躅耳中尚有江聲哀

送楊孟容朝奉西歸

三十始去家四十始南遷五十復還朝白髮正紛然故

人從西來鞍馬何聯翩握手得一笑喜我猶生全別離
多憂患夢覺非因緣惟餘歸耕計粗有山下田久縻太
倉粟空愧鄉黨賢老兄富治行令德齊高年幸此民事
清未厭軍壘偏父老攜壺漿稚子迎道邊應有故相識
問我何當旋君恩閔衰病歸駕行將鞭

次韻孔武仲學士見贈

羨君耽讀書日夜論今古雖復在家人不見釋手處意
求五車盡未惜雙目苦蓬萊倚霄漢簡冊充棟宇學成

擅困倉筆落走風雨破籠閉野鶴短草藏文虎鬚鬚忽
半白兒女無復乳知君不能薦愧我終何補偶來相就
談日落久未去歸鞍得新詩佳句爛如組古風棄雕琢
遺味比樂府且復調墳簞冷然五音舉

送家定國朝奉西歸

我懷同門友勢如曉天星老去髮垂素隱居山更青退
翁聯科第俯仰三十齡仕官守鄉國出入奉家庭鵲鷺
性本靜芷蘭深自馨新詩得高趣衆耳昏未聽笑我老

憂患奔走如流萍冠裳強包裹齒髮坐凋零晚春首歸
路朱轡照長亭縣令迎使君綵服導輜輶長歎或垂涕
平反知有令此樂我已亡雖達終不寧

次韻劉貢父省上示同會二首

流落江湖東復西歸來未洗足間泥偶隨鵬翼培風上
時得衙香滿袖攜落筆逡巡看瀑直醉吟清絕許分題
相望魯衛雖兄弟終畏鄰封犬國齊

掖垣不復限東西賓客來衝霧雨泥白酒黃封開歛灑

朱櫻青籠落提攜五花愧我連書判三道高君免試題
誰遣松蒿同一谷凌雲他日恐難齊

次韻孔武仲三舍人省上

君不見西都校書宗室叟東魯高談鼓瑟手偶然同我
西掖垣並立曉班分左右龍文百斛世無價

屬二公

瓦釜

枵然但升斗諸兄落落不可望兩季幸肯分餘光大孔
奮飛自南鄉聯翩羣鴈相追翔渠家冠蓋尤堂堂

送顧子敦奉使河朔

去年送君使河東今年送君使河北連年東北少安居
慷慨憐君色自得河流西決不入土千里汗漫敗原隰
壯夫奔亡老稚死粟麥無苗安取食君憂臣辱自古然
自說過門三不入忠誠一發鬼神輔心念既通謀計集
堤防旋立村落定波浪欲收蛟蜃泣二年歸國未爲久
故舊相看髮猶黑成功豈在延世下好勇真令腐儒服
此時爲國頌河平當使君名長不沒

席上再送

人言虎頭癡勇作河朔遊黃河六月不辨馬與牛單
車徑北渡橫身障西流虎頭亦不癡志在萬戶侯徜徉
歷三邊歸借坐上籌腰垂黃金印不受白髮羞此計雖
落落但問有志不臨歧且一醉行役方未休

次韻孔文仲舍人酴醿

蒼虵凍不死輕素暖仍歸落葉時吹面繁香自撲幃光
凝真照夜枝軟或牽衣似厭風霾苦應思霧雨霏開樽
迎最盛掃地見初稀賴有清陰在金波肯發揮

送錢承制赴廣東都監

家聲遠繼河西守遊宦多便嶺外官南海無波閒闢舸
北堂多暇得羞蘭忽聞常棣歌離索應寄寒梅報好安
它日扁舟定歸計仍將犀玉付江湍

次韻曾子開舍人四月一二日扈從二首

萬人齊仗足聲勻翠輦徐行不動塵夾道歡呼通老穉
從官雜遝數徐陳旌旗稍放龍蛇卷旒冕初看日月新
天遣雨師先灑道農夫不復誤占辛

農家常以上辛占
麥辛深則麥熟今

年正月八日得辛而雨不時應駕
未出一日初得雷雨麥始有望

衣冠雙日款蓬萊簾脫瓊鉤扇不開清曉逮驚三殿啟
翠華遙自九天來晨光稍稍侵黃蓋瑞霧霏霏著禁槐

千兩翟車觀禮罷歸時滿載德風迴

是日內外命婦皆
會景靈仰瞻三宮

肅然雍穆不言而化諸
公之家有能言之者

再和

病起江南力未勻強將冠劍拂埃塵木雞自笑真無用
蜀狗何勞收已陳行從鑿旗風日細側聽廟樂管絃新

誰知四載勤勞後併舉成功祚泣辛

宸心惻惻念汙萊南籞西池閉不開長樂鳴鞘千乘出
顧成薦鬯萬方來從臣暗泣新宮柳父老行依輦路槐
雙闕影斜朱戶啟都人留看屬車回

次韻張昌言給事省中直宿

還家未暇拂塵衣攜被重來赴落暉省戶鳴騶久分散
宮槐栖鵲共翻飛周廬見日風霾靜斜漢橫空星斗稀
多病心身怯清禁故山依約夢西歸

次韻貢父子開直宿

擲簡搖毫氣吐虹興餘庭葉詠殘紅
今宵文字知無幾
鼾睡簾中笑二公

去年冬轍以起居郎入侍
適英講不逾時遷中書
舍人雖忝冒愈深而瞻望清光與日俱遠
追記當時所見作四絕句呈同省諸公

適英肅肅曉霜清
玉宇時聞槁葉零
風過都城吹廣內
萬人笑語落中庭

銅鉚灑遍不勝寒雨點勻圓凍未乾回首矐矐朝日上

槐龍對舞覆衣冠

通英前有雙槐甚高而柯葉拂地狀若龍蛇講官進對其下

早歲西廂跪直言起迎天步晚臨軒何知老侍曾孫聖

欲泣龍髯吐復吞

轍昔舉制策坐於崇政西廊蓋通英之北也是日晚仁皇自延和步入崇

政過所試帷前瞻望天表最爲親近

講罷淵然似不勝詩書默已契天心高宗問答終垂世
未信諸儒測淺深

次韻張問給事喜雨

已收蠶麥無多日旋喜山川同一雲禾黍趁時青覆壠
池塘流潤綠生文兩宮尚廢清晨集中禁初消永夜薰
倉粟半空民望足深耕疾耨肯忘君

次韻宋構朝請歸守彭城

得郡迎親願不違書來無復寄當歸馬馳未覺西南遠
烏哺何辭日夜飛湖水欲平官舍好茶征初復訟氓稀
平反聞道加食飯五袴應須換破衣

次韻劉貢父西掖種竹

竹迷誰定知迷否趣取滂沱好雨初裁向鳳池吹律處
斲從芸閣殺青餘迎風一嘯朝回早弄月相差直宿疎
應恠籍咸林下客相看不飲作除書

仲馮方作左史必與貢父並直於此

次韻劉貢父省中獨直

簾深巧爲隔朝暎竹密時能引雀喧朝罷宿醒還續夢
靜中諸妄稍歸根坐曹聞道仍分省出沐誰當與比軒
竹簟茅簷它日事重因遺詠記君恩

得告家居次韻貢父見寄

君恩賜告許歸來雨後中庭有綠苔起問日高三丈久
臥聞車過九門開泥封連日傳新語腕脫知君有軼才
十八二十二兩
日除目猥多待得晴乾追後乘未應塵土熱如灰

黃幾道郎中同年挽詞二首

溫恭天賦此心良惠愛人知政術長井水無波任餅綆
牛刀投隙應宮商分符出遍名城守攜被歸從華省郎
不到汝陰遺恨遠坐令湖水減清光

早歲相從能幾時淮陽花發正游嬉鳴弓矍相人如堵

席地滄浪柳作帷十載舊游真是夢一時佳客尚存誰

遙聞葬日車千兩漬酒綿中寄一悲

轍昔與幾道相遇於陳陳守張聖民

相與游從甚密逮今將三十年當時賓客在者少矣而幾道復化去言之悽惻無已

和王定國寄劉貢父

度嶺當年惜遠行過淮今日似前生留連秋思江侵海
搖蕩春心花滿城欲寄尺書慵把筆偶聞佳句獨含情
何時復看清虛會醉聽簫箏促柱聲

故濮陽太守贈光祿大夫王君正路挽詞二首

落落承平佐英英嗣世風芝蘭託庭戶鸞鵠峙椅桐結
客賢豪際傾財緩急中悲傷聞故老淪謝未衰翁

其二

吳中試良守濮上繼嘉聲平賦權家恨蠲租盜俗清家
貧久未葬身去獨留名天報多男子終存好弟兄

韓幹三馬

老馬側立鬃尾垂御者高拱持青絲心知後馬有爭意
兩耳微起如立錐中馬直視翹右足眼光已動心先馳

僕夫旋作奔佚想右手正控黃金羈雄姿駿發最後馬
回身奮鬣真權奇圍人頓轡屹山立未聽決驟爭雄雌
物生先後亦偶爾有心何者能忘之畫師韓幹豈知道
畫馬不獨畫馬皮畫出三馬腹中事似欲譏世人莫知
伯時一見笑不語告我韓幹非畫師

書郭熙橫卷

鳳閣鸞臺十二屏屏上郭熙題姓名崩崖斷壑人不到
枯松野葛相欹傾黃散給舍多肉食食罷起愛飛泉清

皆言古人不復見不知北門待詔白髮垂冠纓袖中短
軸纔半幅慘澹百里山川橫巖頭古寺擁雲木沙尾漁
舟浮晚晴遙山可見不知處落霞斷鴈俱微明十年江
海興不淺滿帆風雨通宵行投篙掾棹便止宿買魚沽
酒相逢迎歸來朝中亦何有包裹觀闕圍重城日高困
睡心有適夢中時作東南征眼前欲擬要真物拂拭東
絹付與汾陽生

題王生畫三蠶蜻蜓二首

饑蠶未得食宛轉不自持食蠶聲如雨但食無復知老
蠶不復食矯首有所思君畫三蠶意還知使者誰

其二

蜻蜓飛翩翩向空無所著忽然逢飛蚊驗爾饑火作一
飽困竹稍凝然反冥冥若無饑渴患何貴一簞樂

贈寫真李道士

君不見景靈六殿圖功臣進賢大羽東西陳能令將相
長在世自古獨有曹將軍嵩高李師掉頭笑自言弄筆

通前身百年遺像誰復識滿朝冠劔多偉人據鞍一見
心有得臨牕相對疑通神十年江海鬚半脫歸來俛仰
慚簪紳一揮七尺倚牆立客來顧我誠似君金章紫綬
本非有綠蓑黃箬甘長貧如何畫作白衣老置之茅屋
全吾真

次韻子瞻題郭熙平遠二絕

亂山無盡水無邊田舍漁家共一川行遍江南識天巧
臨牕開卷兩茫然

斷雲斜日不勝秋
付與騷人滿目愁
父老如今亦才思
一蓑風雨釣槎頭

次韻錢總待制秋懷

壯心老自消
秋思悲不怨
中懷不堪七
那用日食萬
朝陽淨塗潦
白露霑草蔓
夾衣搜故褚
酒債積新券
狙猿便林藪
冠帶愁羶圈
夢追赤松游
食我青精飯
歸心久已爾
佳句聊復勸
近聞洮東將
間出邊馬健
裨王坐受縛
右袂行將獻
念此愧無功
歸歟適吾願

宿滎陽甯氏園

喧卑背城市曠蕩臨溪水車流沂絕壁河潤及桃李居
人有佳思過客得新喜中橋一回顧欲入迷所自

滎陽唐高祖太宗石刻像

并叙

滎陽大海院高齊石像二高不數寸而姿製甚妙唐
高祖爲鄭州刺史太宗方幼而病甚禱之即愈因各
爲一碑刻彌勒佛且記其事至今皆在元祐二年九
月祭告永裕陵過而觀焉作小詩以授院僧

誰言膚寸像勝力妙人天欲療衆生病陰扶濟世賢身
微須覆護眼淨照幾先豈爲成功報猶應歷劫緣

次韻劉貢父從駕

一經空記弟傳兄舊德終慙比長卿扈駕聯翩來接武
登科先後憶題名竹林共集連諸子棣萼相輝賴友生
它日都門俱引去不應廣受獨華榮

次韻劉貢父和韓康公憶其弟持國二首

霜風瑟瑟卷梧蕉燕處超然夜寂寥羽客信來丹鼎具

石宗夢斷水聲遙赤松作伴誰當見黃鵠高飛未易招
劍履終身定何益勤勞付與沛中蕭

愛君憂世老彌深特操要須得失臨晚歲飛騰推有德
故鄉安穩信無心小邦近似西山隱元氣終當北斗斟
聖主方求三世舊老臣何止一遺簪

聞京東有道人號賀郎中者唐人也其徒有識之
者作詩寄之

賀老稽山去不還鏡湖獨棹釣魚船南來太白尋無處

却作郎官又幾年
岱下迎鷺驚典謁
蒙山施藥愍耕田
試窮脚力追行迹
亦使今生識地仙

送家安國赴成都教授三絕

城西社下老劉君
春服舞雩今幾人
白髮弟兄驚我在

喜君游宦亦天倫

微之先生門人惟僕與子瞻
兄復禮與退翁兄皆仕耳

垂白相逢四十年
猖狂情味老俱闌
論兵頓似前賢語
莫作當年故目看

石室多年款誌平
新書久溷里中生
遣師今見朝廷意

文律還應似兩京

送歐陽辯

我年十九識君翁，鬚髮白盡顴頰紅。
奇姿雲卷出翠阜，高論河決生清風。
我時少年豈知道，因緣父兄願承教。
文章疎略未足云，舉止猖狂空自笑。
公家多士如牛毛，揚眉抵掌氣相高。
下客逡巡愧知己，流枿低昂隨所遭。
却來京洛三十載，重到公家二君在。
伯亡仲逝無由追，淚落數行心破碎。
京城東西正十里，雨落泥深旱塵起。

衣冠纏繞類春蠶一歲相從知有幾去年叔爲尚書郎
家傳舊業行有望今年季作澶淵吏米鹽騷屑何當起
前輩今無一二存後來幸有風流似黃河西行淤沒屋
桑柘如雲麥禾熟年豐事少似宜君飽讀遺書心亦足
送韓康公歸許州

功成不願居身退有餘勇心安里閭適望益縉紳重朝
爲北闕辭莫犯南河凍人知疎公達王命顯父送百壺
山泉溢千兩春雷動旋聞二季賢繼以一章控詔書未

云可廷論已爭竦茲行迫寒食歸及掃先塋萬人擁道
看一子腰金從爾曹勿驚嗟令德勸勤種

三日上辛祈穀除日宿齋戶部右曹元日賦三絕
句寄呈子瞻兄

七度江南自作年去年年初喜奉椒槃冬來誤入文昌省
連日齋居未許還

今歲初辛日正三明朝春氣漸東南還家強作銀幡會
雪底蒿芹欲滿籃

北客南來歲欲除燈山火急萬人扶

燈山例以北使見日立

欲觀

翠輦巡游盛深怯南宮鎖鑰拘

次韻王欽臣祕監集英殿井

碧甃涵雲液銅瓶響玉除
汲花攢點罷灑霧喚班初
龍餅煎無數螭研滴有餘
從官方醉飽一酌解清虛

集賢殿考試罷二首

振鷺紛紛未著行初從江海覘清光
卷聲風雨中庭起筆勢雲煙累幅長
病眼尚能分白黑衆毛空復數驪黃

禁中已許公孫第得失何私物自忙

衰病相侵眼漸昏青燈細字苦勞神
遍看大軸知無力聽誦奇篇賴有人
前日鼓旗聞苦戰明朝雷雨出潛鱗
殿廬困極唯思睡却憶登科似後身

問蔡肇求李公麟畫觀音德雲

好事桓靈寶多才顧長康何嘗爲人畫
但可設奇將久聚要當散能分慰所望
清新二大士畀我夜燒香

五月一日同子瞻轉對

羸病不堪金束腰永懷江海舊漁樵對床貪聽連宵雨
奏事驚同朔旦朝大耿功名元自異中茅服食舊相要
一封同上憐狂直詔許昌言賴有堯

次韻劉貢父題文路公草書

鷹揚不減少年時墨作龍蛇紙上飛應笑學書心力盡
臨池寫遍未裁衣

韓康公挽詩三首

閔閔元高世功名自發身堂堂揖真相矯矯出稠人許

國心先定輕財物自親傳經比韋氏世世得良臣

其二

耆年時一二新第闕西南好客心終在忘懷日縱談規
模人共記風味我猶諳誰是羊曇首回車意不堪

其三

師曠聞弦日相如作賦年雖慙衆人後貪值主文賢北
道初聞召南江正遠遷平生闕親近遺恨屬新阡

送王宗望郎中赴河東漕

春初戎馬掠河壩屬國倉皇不解鞍未免驅民餽邊食
旋聞奉使輟郎官年高轉覺精神勝慮穩要令事業安
持節近看蔥嶺雪擁裘應慣鴈門寒

送高士敦赴成都兵鈴

揚雄老病久思歸家在成都更向西邂逅王孫馳驛騎
丁寧父老問耕犁禪房何處不行樂壁像君家有舊題
德厚不妨三世將時平空見萬夫齊

盧鴻草堂圖

昔爲太室遊盧巖在東麓直上登封壇一夜蠶生足徑
歸不復往巖壑空在目安知有十志舒卷不盈幅一處
一盧生裘褐蔭喬木方爲世外人行止何須錄百年入
篋笥犬馬同一束嗟予縛世累歸來有茅屋江干百畝
田清泉映脩竹尚將逃姓名豈復上圖軸

秦虢夫人走馬圖二絕

秦虢風流本一家豐枝穠葉映雙花欲分妍醜都無處
夾道遊人空嘆嗟

朱幘玉勒控飛龍笑語誼譁步驟同馳入九重人不見
金鈿翠羽落泥中

韓幹二馬

王帶胡奴騎且牽銀駿白鼻兩爭先八坊龍種知何數
乞與岐邠並錦韉

試制舉人呈同舍諸公二首

垣中不減臺端峻池上來從柱下嚴同直舊曾連月久

暫來還喜二公兼

僕頃與孫莘老同在諫垣與彭器資同在西掖

直言已許侵

彈奏新告行聞振滯淹顧我麓官何所與西曹只合論
茶鹽

早歲同科止六人中年零落半埃塵却將舊學收新進
幾誤今生是後身骭髒別都遺老驥沉埋祕府愧潛鱗
制科前輩今獨張公安道一人後來未用惟張去華而已
憐君尚勝劉蕡在白首諸
侯呼上賓

次韻張去華院中感懷

登朝已老似王陽脫葉何堪霧雨涼案上細書憎蟻黑

禁中新酒愛鵝黃臨堦野菊偏能瘦倚檻青松解許長

仕宦不由天祿閣坐曹終日漫皇皇

轍頃自績溪除校書郎未至京除右

司諫竟不入館故以爲恨

送周思道朝議歸守漢州三絕

早緣民事失茶官解印重來十二年美惡一周還自復
始知東里解言天

梓漢東西甲乙州同時父子兩諸侯

正孺時出守梓州

它年我

作西歸計兄弟還能得此不

酒壓郫筒憶舊酤花傳丘老出新圖

漢州官酒蜀中推第一趙昌畫花摸

倣丘文播亦西川所無也此行真勝成都尹直爲房公百頃湖

藥城集卷十五